

Sanaziun da la via tras Vulpera

Radunanza cumünala a Tarasp

A la radunanza cumünala da Tarasp, lündeschdi passà, ha il suveran concess trais credits per progets d'infrastructura a Vulpera cun ün import total da passa 1,9 milliuns francs.

BENEDICT STECHER

Fingì l'on passà es gnü infuormà ad üna radunanza cumünala sur d'ün proget per la sanaziun da la via cumünala tras Vulpera. Üna prim'etappa preveza 225 meters via nouva cun üna fermativa per l'auto da posta ed üna rondella per volver. Sco cha l'indschegner incumbensà, Marco Müller, ha infuormà in lündeschdi passà in occasiun da la radunanza cumünala, as tratta d'ün toc via cun duos marchapes e cun üna larghezza da 5,20 meters. Las lingias d'aua, chanaliziun ed electricità suot la via, chi sun per part sur tschient ons veglias, vegnan rimplazzadas cun lingias novas. Sco chal capo cumünal, Christian Fanzun, ha orientà as vuol tour resguard sül turissem a Vulpera e perquai esa previs da realisar il proget manzunà in duos etappas. La prim'etappa vain realisada dals 11 avrigl fin als 6 gün. La seguond'etappa vain fatta d'utuo, a partir da la mità october. La cuverta da catram definitiva dess gnir fatta da primavaira dal 2012. Las piazzas da parcar dal Club Robinson chi ston gnir levadas per eriger la fermativa da l'auto da posta vegnan fatas lung da la via. Per quist proget da via, cullas agiuntas manzunadas, ha approvà il suveran ün credit dad 1,7 milliuns francs.

Marchapè davent da la Punt d'En

La Punt d'En es gnüda realisada cun ün marchapè per pussibilitar eir a peduns da far adöver da la punt. Davent

da la punt d'eira previs ün marchapè fin pro la chasa dal golf a Vulpera da la vart vers la costa. Cun quai cha quel terrain es labil s'haja stuvü perseguitar la varianta cun ün marchapè da l'otra vart da la via vers aval. «Davo lungas trattativas e discussiuns s'esa rivà a la conclusiun d'implinir la costa cun material da s-chav e da realisar uschè il marchapè», ha orientà Fanzun. Cun quai cha quella varianta es bainquant plü chara co'l prim proget ha la radunanza approvà ün credit supplementar da 150 000 francs. Daspò cha la punt es averta pel transit d'autos e peduns s'haja constatà cha blers peduns fan adöver da la sporta. Perquai ha la suprananza cumünala proponü a la radunanza d'installar üna glüminaziun adequata per cha'ls peduns hajan eir da not la pussibilità da far adöver da la sporta. Ils cuosts per quel intent s'amuntan a 85 000 francs. Eir quista dumonda da credit es gnüda approvada cun gronda pluralità. L'inglüninaziun dess eir imbellir l'entrada dal cumün.

Zona da fabrica Curtin vain activada

Suot orientaziuns ha il capo cumünal, Christian Fanzun, orientà a la radunanza sur da la cooperativa da fabrica iniziada tras il cumün. La zona es fingià dispò blers ons averta però fin qua nu sun gnüts realisats ingüns fabricats. «Quist fat ha dat andit al cumün da d'vantar activ e d'inziar la cooperativa. Per cumanzar esa previs da realisar üna chasa cun plüssas abitaziuns per fittar o eir d'aigna proprietà. Üna circulara chi'd es gnüda protromissa in cumün ha gnü ün effet positiv e divers s'han declarats pronti da's participar cun üna parziala da 500 francs e d'vantar commember», ha orientà Fanzun. Tschinch architects han inoltrà lur ideas per la realisaziun dal fabricat. La decisiun vain tratta prosammaing. In quel connex vain eir fundada la cooperativa.



La zona Curtin, illa fraziun da Fontana, dess gnir activada. A dretta, a la fin da la via in fabrica, vain eretta la prima chasa.

fotografia: Benedict Stecher

Forum «Guarda Avegnir»

Guarda In sonda, ils 2 avrigl, ha lö a Guarda il prim forum «Guarda Avegnir». Tenor Maya Zeller, manadra dal proget, es gnü inizià il forum «Guarda Avegnir» in occasiun da la radunanza d'avegnir chi ha gnü lö a Guarda a la fin da schner. «Il böt da quist forum es da pussibilitar a las differentas gruppas da lavor da preschantar lur progets ed impustüt eir da promover la comunicaziun in cumüns», declara Zeller. In occasiun da la conferenza d'avegnir d'eiran gnüdas fuormadas tschinch gruppas da lavor culs temas trafic, energia, agricultura, turissem e cultura. La gruppa Forum «Guarda Avegnir» coordinescha las infuormaziuns da las singulas gruppas e preschainta ils resultats silla pagina d'internet ed organischescha las dietas d'infuormaziun. In quist'occuriun survegnan eir las organisaziuns existentas sco Guarda Turissem, la Pro Guarda o Guardis-

simo la pussibilità d'infuormar ad indigens e possessuors da seguondas abitaziuns sur da lur activitads. A la fin da la part infuormativa moderescha Maya Zeller üna runda da discussiun. «Minchün po declerar ingio cha la s-charpa schmacha», declara la manadra dal forum. Ella spera uschè da manar trasparenza illas activitads in cumün e da promover il respet e la fiduzcha tanter indigens ed esters. Sco cha Zeller declara vain quist intent eir sustegnü dals gremis politics da Guarda. «Nus nu lain in mincha cas na rimplazzar las radunanzas cumünalas», declara Zeller. Il böt es tenor ella da promover la comunicaziun tanter la populaziun da Guarda ed evitar uschè las famas in cumün. «Scha tuot vain bain vulaina cuntinuar cul forum in ün turnus da trais mais». Il prim forum cumainza in sonda a las 13.30 illa chasa da scuola da Guarda. (nba)

Proget cumünal: Clostra e chascharia

La Val Müstair ramassa ideas per ün svilup regional

Cun ün proget per ün svilup agrar regional tschercha la Val Müstair visiuns per üna col-lavuraziun tanter la Clostra San Jon, la Chascharia Val Müstair e las spartas turissem, Biosfera e politica. Las ideas sun vastas ed a la fin dess gnir realisà ün proget cumünal.

NICOLÒ BASS


La Confederaziun sustegna progets agrars per ün svilup regional cul böt da promover la collavuraziun tanter differents partenaris sco l'agricultura, il turissem e l'economia. Eir la Val Müstair ha inizià ün simil proget da svilup regional e vuol unir ils interess e'ls bsögns dal turissem, da la Biosfera, dal Cumün Val Müstair, da la chascharia Müstair e da la Clostra San Jon. «Intant vaina gnü differents sezziadas per ramassar tuot las ideas e'ls giavüschs dals singuls partenaris», declara Walter Anderau, president da la Fundaziun da la Clostra San Jon a Müstair e manader da la gruppa da lavor in Val Müstair. «Nus vain intant notà ils problems e ramassà las primas ideas e visiuns. Uossa stuvaina sclerir scha quai va ad unir tuot ils giavüschs suot ün tet», infuorma Anderau. Ün problem da la Clostra San Jon es nempè il fat, cha la stalla paurla nu correspuonda plü a las pretaisas dal Chantun. «Il bain paurla da la clostra d'eira adüna il plü grond bain da la region cun caracter exemplaric. Cul ir dals ons s'han müdadas las pretaisas e l'infrastructura illa clostra nu permetta plü üna gestiun moderna», de-clera Walter Anderau. El quinta dal giavüsch actual d'ün menaschi cun üna stalla libra. «Però quist giavüsch nun es realistic cul'infrastructura actuala», es el persvas. Perquai es la fundaziun in tschercha d'üna nouva soluziun e tschercha ideas novas per l'utilisaziun da l'infrastructura existenta.

Chasa Jaura muossa film rumantsch

Valchava Vegl e nouv suot il medem tet. Illa bella chasa paurla a Valchava fan ils respunsabels dal museum regional adüna darcheu la punt tanter la tradiziun fin pro la cultura contemporanea: l'Is locals vegls da la Chasa Jaura cun stüva e chadafö naira vegnan preschantadas regularmaing ouvras artisticas, concerts e prelecziuns. Prossiem venderdi, ils 1. avrigl, vain realisada illa Chasa Jaura la radunanza generala dal museum regional. La radunanza cumainza a las 20.00. Davo la radunanza vain muossà il film «Da vender: Chasa Engiadinaisa» da la cineasta Susanna Fanzun. Ella lavora pro Radio e Televisiun Rumantscha (RTR). (anr)

Post regional d'integraziun

Engiadina Bassa La Pro Engiadina Bassa ha elet a Sabina Stricker da Sent in piazza parziala pel post regional d'integraziun. Il proget regional d'integraziun es gnü preschantà ed approvà da la radunanza regionala in avuost 2010. Tenor infuormaziuns da la Pro Engiadina Bassa dess il post d'integraziun esser ün prim lö da contact per esters chi vegnan in Engiadina Bassa. (nba)



L'infrastructura paurla illa Clostra San Jon a Müstair nu's cunfà plü cullas pretaisas. La fundaziun da la clostra es in tschercha da soluziuns, ella vuol in avegnir collavurar eir cun oters partenaris, p.ex. culla Chascharia Val Müstair.

Proget Chascharia Val Müstair

Eir la Chascharia Val Müstair vess da far adattamaints vi da l'infrastructura existenta. Tenor Gilbert Ruinatscha, president da la Chascharia Val Müstair, stuvessan gnir fattas illa chascharia differents reparaturas electricas ed implü stuvess gnir fabricà ün ulteriur schler per la madüranza dal chaschöl. «I' stabilimaint existent nun es quist'investiziun pussibla e perquai vaina elavurà ün nouv proget», declara Ruinatscha. Quist nouv stabilimaint vuol la Chascharia Val Müstair realisar suot il parkegi davant la Clostra San Jon. Quia as tratta però d'üna zona libra speciala in connex culla Clostra San Jon, chi'd es part da la ierta mundiala Unesco. «Uossa sto il cumün sclerir scha quai füss insomma pussibel da fabricar ün nouv stabilimaint in quista zona», declara Ruinatscha. Quai conferma eir il president cumünal Arno Lamprecht e declara cha'ls sclerimaints, respectivamaing la resposta, es amo pendenta. Per Gilbert Ruinatscha füss quai il lö ideal per realisar üna nouva chascharia. El discorra da visiuns sco üna chascharia exponada pel turissem, dad ün lö d'infuormaziun per giasts cun preschantaziun da la Biosfera e d'üna butia cun prodots regionalis ed attraziuns da la clostra. Tenor Ruinatscha

as tratta quia da visiuns per l'avegnir, «ed in quista fasa dal proget stuvessa bain esser pussibel da deponar visiuns?»

Cumanzamaint dal proget

Eir las ideas da Walter Anderau van in quista direcciun. Però el renda attent cha'l proget es amo al cumanzamaint e cha pel mumaint vegnan ramassats ils giavüschs. «Intant sun las pussibilitats amo infinitas e l'andamaint dal proget muossarà lura che chi'd es realistic e che brich.» Eir Anderau ha differents sömms per ün eventual center regional cun ün'aigna marca da prodots da lat ed el vuol s'ingaschar cun corp ed orma per quist proget interesant. Ma Anderau es eir realistic e vezza cha'l process es lung e spinus. «A la fin es eir da chattar üna simbiosia tanter la clostra sco lö da quietezza ed ün center culla chascharia sco menaschi industrial.» Per Anderau es intant il plü important cha'ls differents partenaris our da tuot ils ravuogls interessats s'han chattats ad ün discurs per promover la creaziun da valor in Val Müstair. «Nus train uossa tuots vi da la medemma sua e quai eir illa listessa direcciun», es Anderau cuntaint. La prosca sezziada da la gruppa da lavor in avrigl muossarà in che direcciun cha'l proget as sviluppa.

Forum

Üna duonna curaschusa

Renata Bott-Pitsch da Tschieriv ho gieu il curaschi da furer il bignun, chi's vaiva furmo zieva l'introducziun dal rumantsch grischun in scola in Val Müstair, chi es creschieu ma ch'üngün nun ho gieu il curaschi da tucher. Eir Renata Bott ho spetto, ella ho tadlo, observo, dumando e constatato, cha que chi es gnü publico e pretais in giaretta püssas voutas, nu correspuonda a la realted. Ella s'ho pudida persvader asvessa cha cul rg es gnü üna spiert ester in scola, uschè cha'ls iffaunts haun retgnentschas e difficultad da s'exprimer. Quist spiert ester vain purto a chesa aint illa «barsoc» e'ls genituors nu paun pü ne declerar ne correger las lezchas da lur iffaunts.

Üngün prievlel per l'idiom, que vain pretais, ma as so bain avuonda quaut spert cha iffaunts surpiglian pleds

esters (ingles) e scha' magister declara che chi es «güst rumantsch» e'l pled sto nair sün al uschè aint il cudesch da scola as craja a que. Cul valader eiran tuottüna toleredas eir expressiun s-chet jauras.

450 suottascripziuns sun gnidas ramassadas infra cuort temp, nu disch que avuonda? Scha nu vain uossa reagiu our a Cuira nu dess pretender üngün cha sajans üna democrazia. In connex culs mezs d'instrucziun vain auch üna dumanda: Martin Jäger, schef dal departamaint d'educaziun pretenda, cha ad edir il cudesch da matematica in tuot ils idioms custess que duos milliuns francs. Quant ho alura custieu l'ediziun dal cudesch in rumantsch grischun?

Renata Bott merita ün sincer cumplimaint. Anita Gordon, Silvaplana